

**LISTOVI...****GRAČANIČKI GLASNIK**  
časopis za kulturnu historijuBroj 52  
Godina XXVI  
Novembar, 2021.  
[str. 179-194]

© Monos 2021

LISTOVI...

# Listovi gračaničkog kalendara od 9. 5. do 1.11.2021.

---

**Prof.dr. Omer Hamzić**

---

**20.5.2021.****Epidemiološka situacija: stanje se poboljšava, ukida se policijski sat...**

To je preporuka Kriznog štaba Federalnog ministarstva zdravstva, koju je prihvatila Vlada Federacije BiH. Novim naredbama dozvoljeno je okupljanje, ali ne više od 30 osoba u zatvorenom i ne više od 70 osoba na otvorenom prostoru, uz obaveznu fizičku distancu od najmanje dva metra. Vladama kantona, odnosno kantonalnim štabovima naređeno je uvođenje restriktivnijih mjera "sram procjene epidemiološke situacije u kantonu..."

**24. 5. 2021.****Umro Đorđo Panić, ugledni Gračanlija, privrednik i političar**

Đorđo Panić je sin aktivnog oficira kraljevske vojske Todora Panića, kasnije istaknutog učesnika u organizovanju ustanka na Ozrenu, 23. 8. 1941. godine, bliskog saradnika komunističkog vođe tog ustanka i komandanta Ozrenskog partizanskog odreda Todora Vujasinovića. Nakon poznatog puča na Ozrenu, u kojem je usta ničko vodstvo silom preuzela četnička skupina Cvijetina Todića, 18. 4. 1942., Todor Panić se nije povukao sa Vujasinovićevom grupom, već je ostao na Ozrenu, izgleda, u namjeri da spriječi djelovanje Todića, koji se pripremao da potpiše poznati sporazum o kolaboraciji sa ustašama, što će se i desiti u Lipcu, krajem juna 1942. Iako se Todor Panić jedno vrijeme uspješno skrivao po ozrenskim šumama, njegovo kretanje upratili su četnički špijuni Cvijetina Todića, koji će ga na prevaru i mučki ubiti (tokom brijanja), negdje u području Prenje iznad Karanovca, krajem juna ili početkom jula 1942. godine. Za narodnog heroja Jugoslavije Todor Panić je proglašen 1952. godine. Kad su mu četnici ubili oca, Đorđo Panić je imao svega 4 godine (rođen je 1938. godine). Ostao je sa majkom, koja se nakon tragedije s djecom prvo smjestila kod prijatelja u Tuzli, da bi se, nakon završetka rata s porodicom trajno nastanila

u Gračanici. Đorđo Panić je završio osnovnu i srednju školu u Tuzli, a potom Poljoprivredni fakultet – smjer agronomije u Sarajevu. Poslije fakulteta i zasnivanja porodici radio je u poljoprivrednim zadrugama i poljoprivrednim preduzećima u Gračanici i Bosanskom Petrovom Selu. Od početka se isticao svojom stručnošću, ali je ispoljavao i rukovodne i organizacione sposobnosti, vrlo rano počeo se baviti političkim radom. Bio je na odgovornim funkcijama u poslovnim strukturama nekada moćne radne organizacije “Trgoproduct” u kojoj je bila skoncentrisana gotovo cjelokupna trgovina i poljoprivreda Gračanice. Od 1974. do 1978. godine nalazio se na funkciji sekretara Opštinskog komiteta Saveza komunista Gračanica. Upamćen je po svojoj principijelnosti i dosljednosti u provođenju dogovorene politike. Jedan je od prvih kreatora i zagovornika politike ravnomjernijeg razvoja opštine Gračanica, koja se u tom vremenu pokazala i ispravna i korisna. Nakon ostvarenog punog radnog staža u priredi Gračanice, otišao je u mirovinu prije izbijanja ratnih sukoba 1992. godine. Iako je kao i mnogi drugi Srbi mogao napustiti Gračanicu, Đorđo Panić je sve četiri ratne godine (1992. – 1995.), proveo s porodicom u ovom gradu dijeleći sudbinu svojih komšija i sugrađana iako je zbog toga ružno “prozivan” sa Ozrena. Živio je kao penzioner tiho i povučeno, uvažavan i poštovan od svih koji su ga poznavali. Sahranjen je 25. 5. 2021. godine na Pravoslavnom groblju u Gračanici.

### **25. 5. 2021.**

#### **Dan odbrane – obilježen skromno i bez većih okupljanja**

Osim polaganja cvijeća na spomen obilježja, gradonačelnik Nusret Helić priredio je tradicionalni prijem za nosioce najvišeg ratnog priznanja “Zlatni ljiljan” i za njihove porodice.

### **26. 5. 2021**

#### **Gračanica – treći dan bez novoizaraženih korona virusom**

To je znak da se počela stabilizirati epidemiološka situacija i u Gračanici. Sa današnjim danom aktivno pozitivnih bilo je 11, a u izolaciji 37 osoba, saopšteno je iz Doma zdravlja u Gračanici. Na području Tuzlanskog kantona aktivno zaraženih je 226 osoba, od čega je 40 hospitalizovano, dvije osobe su na mehaničkoj ventilaciji, a ostali pozitivni su u kućnoj izolaciji.

### **31. 5. 2021.**

#### **Održana 6. sjednica Gradskog vijeća**

#### **Gračanica: izvršeno imenovanje članova vijeća mjesnih zajednica i usvojeno nekoliko redovnih izvještaja**

Sa spomenutim imenovanjima većina mjesnih zajednica na gradskom području dobila je svoja rukovodstva. Osim izvještaja o radu i finansijskom poslovanju u 2000. godini javnih preduzeća “Komus” i “Vodovod”, pažnju vijećnika privukao je i izvještaj o izvršenju budžeta Grada za prva tri mjeseca 2021. godine. Vrijedi spomenuti još tri izvještaja koji se odnose na prošlu godinu: o realizaciji programa rada vijeća mjesnih zajednica, o radu Gradskog pravobranilaštva i o provedenim podsticajnim mjerama i njihovim efektima u poljoprivredi na području Grada Gračanica. Usvojena je odluka o dodjeli gradskih priznanja, koja će dobitnicima biti uručena za Dan Grada, 2. juna

### **2. 6. 2021.**

#### **Dan Grada, 2. juni – svečana sjednica Gradskog vijeća...**

...održana je nakon svečanog polaganja cvijeća na spomen obilježja u Gradu, naravno uz poštivanje aktuelnih epidemioloških mjera... Sjednici su prisustvovali neki ministri iz TK i drugi gosti... Umjesto uobičajenog referata, prikazan je dokumentarni film o postignućima Grada između dva obilježavanja, a potom su dodijeljena i tradicionalna godišnja

priznanja Grada Gračanica. *Zlatna plaketa* dodijeljena je Javnoj ustanovi Dom zdravlja Gračanica i Udruženju mladih "Sijedi krš", a *Zlatna značka*, privredniku Mirsadu Heliću, sportskom radniku Nedimu Musiću i Refiji Okić, za rezultate u humanitarnom radu.

### 3. 6. 2021.

#### **Ublažene epidemiološke mjere: sportska publika se vraća na tribine**

Vlada FBiH je odobrila preporuke Kriznog štaba Federalnog ministarstva zdravstva da se u zatvorenom prostoru može okupljati do 50, a na otvorenom do 100 osoba. Moguće je i organiziranje većih skupova uz jedan od uvjeta: posjedovanje negativnog antigenskog ili PCR testa, ne starijeg od 48 sati, ili potvrde o prebolovanom COVID-19, ne starije od šest mjeseci ili potvrde o završenom cijepljenju. Dozvoljeno je održavanje kongresa, konferencija i drugih edukativnih skupova, kojima bi moglo prisustvovati do 100 osoba, a ukoliko skup ima više od 100 osoba potrebno je da sudionici zadovoljavaju jedan od tri spomenuta uslova kao i za ostale velike skupove. Novina je i da je dozvoljeno održavanje profesionalnih sportskih natjecanja na otvorenom, uz prisustvo gledalaca, uz uvjete korištenja do 30 posto kapaciteta stadiona, a ne više od 500 osoba po tribini. Osobe na tribinama moraju nositi maske, a prilikom ulaska i izlaska sa stadiona obavezno je poštivanje epidemioloških mjera, za što su zaduženi COVID redari.

### 4. 6. 2021.

#### **Prvi bh. on-line sajam namještaja – prva nagrada za Kompaniju "Brezje namještaj" iz Gračanice**

To je odluka stručnog žirija Prvog bh. online sajma namještaja kojeg su činili predstavnici Vanjskotrgovinske komore BiH, Privredne komore FBiH, Ekonomskog fakulteta Univerziteta u Sarajevu, Ministarstva privrede Kantona Sarajevo, te predstavnici grupacije Targer i WMTA Ustanove za obrazovanje odraslih Banja Luka. Svečanost povodom

dodjele tih priznanja organizirala je Simperfect agencija za marketing i promociju, a domaćini su bili Vanjskotrgovinska komora BiH i Privredna komora Federacije BiH. Digitalizacija društva i poslovnih tokova, kako je rekao predsjednik VTK BiH Ahmet Egrlić, planetaran je proces i Komora, pogotovo u ovako izazovnim vremenima, podržava inovativne pojedince i grupe koji i na ovaj način prepoznaju potrebe tržišta. Izvršna direktorica Simperfect agencije Samira Avdić je istakla značaj online poslovanja u budućnosti, ali i mogućnosti proizvođača i prodavača namještaja u takvom komercijalnom formatu ([www.namjestaj.shop](http://www.namjestaj.shop))

### 17. 6. 2021.

#### **Promotivna Konferencija "Akademije za restrukturiranje i upravljanje promjenama" u Gračanici**

Ovo je bilo prvo javno predstavljanje te organizacije, koja je u prethodne dvije godine funkcionisala u formi poluzatvorenih radionica kroz aktivnosti Agencije za razvoj općine Tešanj. Konferencija je namijenjena za rukovodioce i čelne ljude kompanija koje posluju na domaćem i stranom tržištu. Organizatori promotivne konferencije u Gračanici bili su: spomenuta Agencija za razvoj općine Tešanj, "Idea Co" iz Gračanice, BI "Consulting" iz Sarajeva, "Aicomp" iz Maglaja i "Revizija Hasičević" iz Gračanice. Obradeno je pet ključnih tema: "Razvoj i inovacije", "Upravljanje promjenama", "Upravljanje organizacijom", "Digitalna transformacija" i "Upravljanje finansijama". Predavači su bili vrsni stručnjaci iz tih oblasti: prof. dr. Ismar Alagić, mr. Samir Mešić, Sead Jahić dipl. inž. maš, mr. Adis Mustabašić i doc. dr. Amir Hasičević. Konferenciji je prisustvovalo pedesetak predstavnika vodećih kompanija iz Tuzlanskog i Zeničko-Dobojskog kantona, koji su upoznati sa praktičnim alatima i metodama upravljanja promjenama kroz konkretne poslovne slučajeve iz regije i svijeta, što je i bio cilj ovog skupa.

**19. 6. 2021.****Obavljena prva laparoskopska operacija debelog crijeva u Općoj bolnici Gračanica**

Pacijent je sedmi dan nakon operacije otpušten na kućno liječenje. Radi se o zahvatu sa minimumom hirurške traume i brzim postoperativnim oporavkom. Ovaj operativni zahvat izveo je medicinski tim u sljedećem sastavu: Dr. Ferid Konjić, spec. hirurg (JZU UKC Tuzla), Dr. Enes Idrizović, spec. hirurg (JZU UKC Tuzla), Dr. Armin Begović, spec. hirurg (JZU OB Gračanica), Dr. Amra Aljukić-Čosićkić, spec. anesteziologije (JZU OB Gračanica), Ervin Zečević, anestezičar (JZU OB Gračanica), Majda Jukić-Halidović, instrumentarka (JZU OB Gračanica), Dženeta Mulaibrahimović, instrumentarka (JZU OB Gračanica). Nakon uspješno obavljene operacije, sa Hirurškog odjela Opće bolnice u Gračanici uputili su riječi zahvalnosti *Klinici za hirurgiju Univerzitetsko-kliničkog centra Tuzla na dugogodišnjoj saradnji i podršci hirurškom odjelu JZU Opće bolnice "Dr. Mustafa Beganović" Gračanica, kao i kolegama sa te klinike koji su učestvovali u ovom operativnom zahvatu.* (Izvor: Radio Gračanica)

**21. 6. 2021.****Promocija 51. broja "Gračaničkog glasnika": obilježena 25. godišnjica izlaženja Časopisa**

Promocija ovog broja obavljena je u ugodnom ljetnom ambijentu na terasi Osman-kapetanove medrese u Gračanici uz prisustvo brojnih Gračanlija i uglednih gostiju iz Tuzle, Tešnja, Gradačca i Srebrenika... Ovom promocijom ujedno je označen i početak ovogodišnje kulturne manifestacije "Ljetne večeri pod lipama Gračanice", koja je još prije dvadesetak godina i osmišljena upravo na stranicama ovog časopisa. U svom kratkom obraćanju, glavni i odgovorni urednik Časopisa, prof. dr. Omer Hamzić je između ostalog rekao: "Malo je gradova i čaršija u Bosni i Hercegovini koje imaju takav mega zapis



*Slijeva nadesno: prof. dr. Adnan Jahić, prof. dr. Omer Hamzić i doc. dr. Salkan Užičanin*

iz svoje kulturne historije, tradicije, kulture sjećanja... Privredničkim žargonom rečeno, mi smo ovdje u Gračanici, napravili rezultat. Ponosan sam što sam tome dao i svoj lični doprinos onoliko koliko sam mogao i znao. Dugujem zahvalnost i svima onima koji su u proteklih 25 godina bili uz nas. Bolji vakum nismo mogli dati svojoj Gračanici." Težišna izlaganja imali su gosti promocije – prof. dr. Adnan Jahić i doc. dr. Salkan Užičanin sa Odsjeka za historiju Filozofskog fakulteta u Tuzli, koji su, svaki na svoj način, pohvalno govorili o Časopisu i čestitali Redakciji rijeđak jubilej – 25 godina kontinuiranog izlaženja časopisa, a potom ukratko predstavili publici svoje radove, objavljene u ovom broju. Promociju je u pomalo emotivnom tonu moderirao novinar Fahrudin Kurtović, dopisnik TV TK iz Gračanice.

**28. 6. 2021.****Premинуo general Hazim Šadić, ratni komandant Drugog korpusa Armije R BiH**

Bio je na čelu najsnažnijeg korpusa Armije RBiH u najtežem razdoblju rata, kada su Republika Bosna i Hercegovina i njena Armija vodili bitku za opstanak, ali i u vremenu ratne prekretnice (1994.), kada branitelji Bosne preuzimaju inicijativu. Uspješno je komandovao i rukovodio odbranom Gradačca, Tešnja i Maglaja, Čelića, Olova, Teočaka i Sapne, te slobodnih teritorija Brčkog i Doboja. Kao



*Slijeva nadesno: Osman Puškar, Hazim Vikalo, Hazim Šadić (uspomena na oproštajnu posjetu gen. Šadića Gračanici, nakon odlaska sa dužnosti komandanta Drugog korpusa A BiH, krajem 1994.*

komandant Korpusa zaslužan je i za mnoge oslobodilačke poduhvate Armije RBiH na ovome prostoru i zauzimanje jakih agresorskih uporišta poput Vijenca, Grede, Visa, Lisače itd. U čin brigadnog generala Armije RBiH proizveden je u decembru 1993. godine. Dobitnik je najvišeg ratnog priznanja "Zlatni ljiljan" i drugih priznanja. Rođen je 6. novembra 1943. godine u Čeliću. Osnovnu školu je završio u rodnome mjestu, a srednju vojnu školu u Sarajevu, nakon čega upisuje i završava i Vojnu akademiju Kopnene vojske u Beogradu (1968.). Kao oficir JNA službovao je u Tolminu, Šibeniku i Tuzli. U međuvremenu je završio i Komandno-štabnu akademiju u Beogradu (1981.). Tokom službe u JNA napredovao je do čina potpukovnika. S izbijanjem agresije na Bosnu i Hercegovinu stupio je u redove Teritorijalne odbrane RBiH. Krajem aprila 1992. imenovan je na dužnost načelnika Okružnog štaba Teritorijalne odbrane RBiH Tuzla, a sa formiranjem

2. korpusa Armije RBiH (krajem septembra iste godine) postavljen je za zamjenika komandanta korpusa. U februaru 1993. godine preuzeo je dužnost komandanta 2. korpusa, na kojoj ostaje do kraja novembra 1994. godine. Kraj rata dočekao je na dužnosti vojnog atašea u ambasadi Bosne i Hercegovine u Republici Turskoj. U vojno-diplomatskoj misiji ostao je do 1997. godine, nakon čega obavlja dužnost savjetnika za vojna pitanja predsjednika Predsjedništva BiH Alije Izetbegovića i generalnog sekretara Stalnog vojnog komiteta Bosne i Hercegovine. Ukazom Predsjedništva BiH proizveden je u čin generalmajora (2000. godine). Tokom Odbrambeno-oslobodilačkog rata 1992.-1995., više puta službeno je dolazio u Gračanicu, obilazeći komande Operativne grupe 2 i njenih jedinica, te položaje Armije RBiH na ovome prostoru. Još u junu 1992. godine, prilikom svoje prve posjete, za Radio Gračanicu je između ostalog izjavio: *"Dijelim mišljenje svih članova komande Okružnog štaba da je Teritorijalna odbrana Gračanice jedna od najorganizovanijih cjelina i da ovdje u narednom periodu nećemo imati nikakvih ozbiljnijih problema..."* Slične ocjene je davao i u kasnijim prilikama, uzimajući gračaničke jedinice kao primjer uspješnih, pouzdanih i profesionalnih vojnih formacija. (Izvor: Radio Gračanica). Ukopan je u mjesnom greblju u rodnom Čeliću.

### **30. 6. 2021.**

#### **Održana sedma sjednica Gradskog Vijeća: usvojen Program kapitalnih investicija Grada s Planom realizacije za period 2021. – 2025. godina**

Riječ je o vrlo obimnom dokumentu (na oko 500 stranica), u kojem se kroz niz tabela i obrazloženja daju opisi planiranih projekata sa podacima o ukupno potrebnim sredstvima za njihovu realizaciju u narednih pet godina, koji će se, kako je predviđeno, finansirati iz budžeta, kredita, donacija i/ili drugih izvora. Ovaj dokument treba da posluži Gradskoj upravi kao osnova za bolje planira-

nje i upravljanje sredstvima razvoja. Projekti su razvrstani po grupama, po planiranim godinama realizacije, po izvorima finansiranja itd. Za narednih pet godina planirana su 394 projekta iz raznih oblasti u ukupno procijenjenoj vrijednosti od 75.624.982 KM. Plan će se svake godine ažurirati, prema uslovima i dinamici njegove realizacije. Na ovoj sjednici, između ostalog, Vijeće je usvojilo i Odluku o broju i visini stipendija za učenike srednjih škola i studente. Prema ovoj odluci, u školskoj 2021/2022 godini učenicima i studentima dodijelit će se ukupno 110 stipendija. Godišnja stipendija za studente iznosi 1.200, a za učenike srednjih škola 600 KM. Izvršena su i imenovanja i razrješenja članova stalnih komisija i drugih tijela Gradskog vijeća

### 5. 7. 2021.

#### Premинуo Hajrija Iljazović, ratni vojni invalid i nosilac ratnog priznanja "Zlatni ljiljan"

Rođen je 20. 05. 1972. u Škahovici. U odbranu zemlje uključio se kao dobrovoljac od aprila 1992., prvo kroz seoske straže i TO... Uključuje se u redove 111/221 gračaničke brigade od samog njenog formiranja. Kao borac i komandir Izviđačko-diverzantskog voda, sa svojom jedinicom borio se na gradačaćkom, brčanskom, dobojskom i olovskom bojištu. U ljeto 1995. godine pretrpio je i teško ranjavanje (ostao je bez noge). Za iskazanu hrabrost odlikovan je najvećim ratnim priznanjem "Zlatni ljiljan", 1. 9. 1995. godine. Ukop i dženaza preminulom obavljena je 6. 07. 2021. godine na mezarju Iljazović u Škahovici.

### 07. 07. 2021.

#### Premинуo Hadži Dževdet Tinjić iz Zagreba – Gračanlija po rođenju

...ugledan privrednik i poslovni čovjek, istaknuti vakif, aktivista Islamske zajednice i bošnjačkih organizacija Hrvatskoj. Rođen je 1948. godine u Tuzli, osnovnu školu završio je u Gračanici, a mašinsku tehničku u

## Iljazović (Šahde) Hajrija



i ručnim bombama uništio tri četničke zemunice, ubijeno šest četnika, zarobljena puška M-48 i 2 AP. U toj akciji je ranjen.

- Maja 1994. godine u diverzantskoj akciji u rejonu Bošnjakuše, ušao sa grupom četnicima iza leđa, uništio jednu zemunicu iz RPG-a, jedan četnik ubijen i nekoliko ranjenih.

- Maja 1994. godine u diverzantskoj akciji na Vis-u iz RPG-a uništio četnički PAT sa posadom.

Rođen 20.05.1972. godine u Babićima. Dijete iz siromašne radničke porodice. U odbranu zemlje uključio se kroz seoske straže od aprila 1992. godine i postavljen je za K-dira IDO. Ističe se svojim radom i ponašanjem u jedinici, cijenjen od saboraca, pravi vođa. Sa jedinicom boravio na ratištima Gradačac 1992, Brčko 1992, Svjetlića 1993, Olovo i Vareš 1994. godine.

Izveo je preko dvadeset diverzantskih akcija u z/o svoje jedinice, donijeo preko dvjesto mina iz četničkih minskih polja, fotografije iz četničkih kuća u Skipovcu kao dokaz njegovog ulaska u duboku pozadinu četnika.

- Marta 1993. godine u diverzantskoj akciji na Visu iz RPG-a uništio dvije četničke zemunice, kojom prilikom su ubijena dva četnika a četiri ranjena, tom prilikom je zarobio i donijeo dvije AP.

- Aprila 1994. godine u diverzantskoj akciji iz RPG-a

Dobrovoljno je učestvovao u mnogim akcijama oslobađanja značajnih kota i četničkih utvrđenja u z/o 221. bbr i među najzaslužnijim je borcima za uspješno izvedenu akciju zauzimanja značajne kote 692 Vis. 24.06.1995. godine prilikom izvršenja postavljenog zadatka izviđanja rejona "Milatuša" u povratku je teže ranjen od PPM, ostao je bez desne noge. Od početka rata do danas, Hajrija je uništio dvadeset četničkih zemunica i zarobio veće količine MTS-a.

Više puta je pohvaljivan od strane k-danta bataljona, 1994. godine nagrađen je od strane k-danta 221. bbr sa 50 DM, a IDO na čijem je čelu je pohvaljeno od k-danta 221. bbr.

Na osnovu gore navedenih borbenih rezultata, ispoljene hrabrosti i ljudskih kvaliteta, predlažemo Iljazović (Šahde) Hajriju za priznanje "Zlatni ljiljan".

Tuzli. Prvo zaposlenje dobio je u gračaničkom "Feringu". Kasnije je osnovao privatnu firmu za izradu metalne galanterije "Megati". Odselio je u Zagreb 1986. godine, gdje se nastavlja uspješno baviti privatnim biznisom. Razvio je posao na prostoru Hrvatske, Bosne i Hercegovine, a jedno vrijeme imao

je registrovanu firmu u Beču. Tokom najtežih dana agresije na Bosnu i Hercegovinu (1992.-1995.) dao je neizmjeran doprinos u prikupljanju i slanju pomoći za našu zemlju, ali i rodnu Gračanicu. Znatno je doprinio razvoju i jačanju Islamske zajednice u Hrvatskoj, kao i radu bošnjačko-muslimanskih organizacija i udruženja. U dva mandata bio je i član Mešihata Islamske zajednice u Hrvatskoj. Ukopan je u Gračanici, na mezarju Šabuša, a dženaze-namaz je predvodio muf-tija zagrebački Aziz ef. Hasanović

### 9. 7. 2021.

#### **Tokom rekonstrukcije gradskog parka u Gračanici otkriven zaboravljeni stari bunar iz "turskog vaktā"**

Lokalitet će biti obilježen i zaštićen za kasnija istraživanja i revitalizaciju u jednu zanimljivu buduću turističku atrakciju u gradu. Inače, kako je i planirano, u parku je tokom ljeta izvršena rekonstrukcija šetnica i trotoara kao i reparacija i popravka postojećih klupa. Uz šetnice i trotoare izvršena je i sanacija trotoara duž ulice 22. divizije. Vrijednost projekta je oko 50.000 KM a podržan je od strane Turističke zajednice Tuzlanskog kantona, uz učešće Grada Gračanica.

### 17. 7. 2021.

#### **U "Art Centru" u Gračanici otvorena izložba umjetnika iz Francuske i BiH "(a)political landscape"**

Izložba je realizirana u sklopu projekta Međunarodna umjetnička rezidencija, a nastupilo je devet umjetnika iz Francuske i Bosne i Hercegovine: Camille Bleu-Valentin, Daphné Boussion, Capucine Lageat and Antonie Perroteau, Marjorie Le Berre, Chiare Pagano, Mak Hubjer, Mladen Miljanović i Bojan Stojić. Autorica izložbe je francuska vizualna umjetnica Camille Bleu-Valentin kojoj je ovo druga posjeta Art Centru u Gračanici (ACG). Projekat "Međunarodna umjetnička rezidencija" realiziran je kroz četiri aktivnosti: rezidencijalni boravak u Gračanici, organizacija

grupne izložbe, kreativna radionica za učesnice, edukativno-istraživački obilazak spomenika srednjovjekovne Bosne. Posebno zanimanje izazvale su dvije kreativne radionice za učesnice s područja Gračanice i okoline. U njima je 15 učesnica imalo priliku istražiti svoj odnos s bliskim krajolikom. Radionice su uključile stvaranje slika pomoću print metode "cijanotip". Jedan broj učesnica u radionici bile su i članice Udruženja "Futura" iz Gračanice. Nositelj projekta je Udruženje za kulturu "Kontrast" u saradnji s internacionalnom međunarodnom inicijativom ACG, uz sponzorstvo i podršku grada Saint-Nazaire i slikarice Mirele Kulović iz Bostona, suosnivačice Udruženja za kulturu "Kontrast" i inicijatorice ove ideje, koju s Gračanicom povezuju porodični korijeni i porijeklo.

### 28. 7. 2021.

#### **Počela masovna vakcinacija u Tuzlanskom kantonu**

Nakon vakcinisanja većeg dijela populacije, starije od 60 godina i nabavke većih količina vakcina, na području Tuzlanskog kantona, po preporuci Federalnog zavoda za javno zdravstvo, počinje masovna vakcinacija osoba starijih od 18 godina. Način organizacije masovnije vakcinacije određuju domovi zdravlja u skladu sa svojim mogućnostima. Cilj je da se u što kraćem roku, koristeći povoljniju epidemiološku situaciju, vakciniše što veći broj stanovnika TK.

### 30. 7. 2021.

#### **Gračaničkoj Općoj bolnici doniran još jedan hemodijalizni aparat**

Radi se o donaciji Fondacije "En-Nedžat" iz Kuvajta. Donaciju je uručio dr. Muhamed Ismail el-Ensari, direktor Fondacije, koji ovih dana sa svojim saradnicima boravi u posjeti Vakufskoj direkciji Islamske zajednice BiH. Ovo je 14. po redu aparat koji je u posljednjih nekoliko godina stigao u ovaj hemodijalizni centar. Time su stari, dotrajali hemodijalizni aparati, u potpunosti zamijenjeni novim.

Inače, trenutno, u ovaj centar dolaze 54 pacijenta iz pet gradova i općina Tuzlanskog kantona: Gračanice, Doboj Istoka, Lukavca, Gradačca i Srebrenika.

#### 4. 8. 2021.

**“Ljetne večeri pod lipama Gračanice”:  
Ibrahim Jukan – 30 godina  
umjetničkog rada**



Ovaj vrsni interpretator sevdalinke i dobre narodne pjesme, svoj vrijedan jubilej obilježio je i u svojoj rodnoj Gračanici, sa svojom najvjernijom publikom. Na koncert koji je priredio na terasi Osman-kapetanove medrese došli su mnogobrojni posjetioči svih uzrasta i njegovi prijatelji da s njim podijele radost i da i u simboličnom smislu obilježe značajan trenutak jedne uspješne karijere. Kao i mnogo puta do sada imali su priliku uživati u pjesmi ovog svog uspješnog sugrađanina. Pjevao je sevdalinke, koje je, kako voli reći, učio od legendarnog Safeta Isovića, ali i svoje poznate hitove kao što su: “Jasna”, “Mutna rijeka”, “Otišla, pa šta”, “Carica”. Poseban aplauz dobio je za dvije pjesme, posvećene svom rodnom gradu, bez kojih ne može proći ni jedan njegov koncert: “Kad pogledam sa Vuknića” i “Gračanicu voda zaplavila”. Starije Gračanlije pamte ga još iz dječaćkih dana kada je počeo nastupati u Kulturno-umjetničkom društvu “Adem Alić” u prelijepoj pozorišnoj dvorani tek otvorenog Doma kulture u Gračanici, 1978. godine. Nekoliko godina kasnije posvećuje se estradi,

a u nešto zrelijim godinama i proizvodnji zdrave hrane na svom privatnom imanju u Gračanici. Tako je na jedinstven način uspio spojiti porodični biznis i estradu.

#### 7. 8. 2021.

**Obilježena godišnjica bitke na Visu**

Program obilježavanja počeo je dan ranije, u petak 6. augusta učenjem Jasina i dove šehidima i poginulim borcima u džamiji Mustafići. Istog dana od 17.00 sati na izletištu Vis priređeno je tradicionalno boračko druženje. Centralnoj manifestaciji u subotu je prethodilo polaganje cvijeća na Centralnom spomen-obilježju u Gračanici i spomen obilježju šehidima i poginulim borcima u MZ Babići. O značaju pobjede na Visu su govorili gradonačelnik Nusret Helić i Nesib Kahvedžić, a obratio se i Sadržmir Džebo, predsjednik Organizacije porodica šehida i poginulih boraca Gračanica. U revijalnom dijelu programa nastupili su Irfan Kasumović, koji je citirao pismo rahmetli Alije Izetbegovića – prvog predsjednika Predsjedništva Republike BiH i pjevač Ibrahim Jukan koji je otpjevao ratnu pjesmu “Crni oblak”. Vjerski dio programa predvodio je Ahmet ef. Mustafić – imam džemata Mustafići (Babići). Nakon centralne svečanosti uslijedio je Malonogometni noćni turnir. Potom su članovi sekcije Udruženja mladih Sijedi krš Babići – “Budi dobar komšija”, dodijelili osam priznanja, nastavnicima, učiteljima i učiteljicama, koji su dio svog života posvetili obrazovanju Babićana. Nekima je priznanje dodijeljeno posthumno. U nedjelju je u sklopu obilježavanja godišnjice oslobođenja Visa održan i Lovački nišan, te Turnir u odbojki na pijesku (izvor: Radio Gračanica)

#### 13. 8. 2021.

**Je li Gračanica pred redukcijama u  
snabdijevanju vodom, prvi puta nakon  
desetak i više godina?**

Učestali apeli i upozorenja gradske vlasti i JP “Vodovod i kanalizacija” da bi usljed du-

gotrajne suše moglo doći do nestašice vode ukoliko se ne pristupi štednji i racionalnoj potrošnji, očigledno nisu urodili plodom. Na posljednjem u nizu sastanaka u kabinetu gradonačelnika, direktor JP "Vodovod i kanalizacija" Senad Hamidović je upozorio da je stanje alarmantno na području cijelog Grada, kako u samoj Gračanici tako i u ostalim naseljima u kojim vodovodima upravljaju mjesne zajednice. Povećana potrošnje vode bila je očekivana, ali ne u mjeri da nam je količina vode u rezervoarima smanjena i za 10 puta. Kako se moglo čuti, najveće probleme prave neodgovorni građani koji vrše neracionalno korištenje i rasipanje vode, zalijevanjem, pranjem dvorišta ali i punjenjem vodom bazena u dvorištima koji, svojim kapacitetima i zapreminom zahtijevaju enormne količine vode. Ukoliko se ovakvo ponašanje nastavi, nažalost, uslijedit će kažnjavanja i isključenja sa vodosnabdijevanja neodgovornih, ali i ograničenja potrošnje i redukcije za sve ostale potrošače, što nije zabilježeno u Gračanici u zadnjih desetak i više godina. "Ponovo apalujemo da se voda racionalno koristi kako zbog pojedinaca ne bi ispaštali svi građani. Također apelujemo na građane da komunalnim redarima prijave one koji nesavjesno troše vodu", poručeno je sa posljednjeg sastanka kod gradonačelnika Helića.

## 20. 8. 2021.

### Epidemiološka situacija pogoršava se i u Gračanici

To je saopšteno sa sjednice Gradskog štaba civilne zaštite. Trenutno je evidentirano 12 pacijenata, pozitivnih na korona virus, dok je 14 osoba u kućnoj izolaciji. Vakcinisanje se vrši svakodnevno u prostorijama Doma zdravlja ili u BKC-u Gračanica (u slučaju masovnijih akcija). Od vakcina, ovih dana aktuelna je "Astra zeneca" i "Sinofarm". Takođe je saopšteno da je završen proces vakcinisanja rizičnih dobnih skupina tako da od sada vakcinu mogu primati svi punoljetni građani koji se prijave na stranicu Zavoda za javno

zdravstvo TK ili dođu lično sa zdravstvenom knjižicom u prostorije Doma zdravlja. Značajno sa jučerašnjim danom u Gračanici je vakcinisano 7.020 osoba.

## 28. 8. 2021.

### Dvije smotre folklora: u Malešićima i Stjepan Polju

Sedma smotra folklora pod nazivom "Iz naše sehare" održana je u Sportskoj dvorani u Malešićima uz učešće 6 kulturno-umjetničkih društava i sekcija. U Stjepan Polju počela je 8. internacionalna smotra folklora uz učešće 6 domaćih i jedno kulturno-umjetničko društvo iz Srbije.

## 31. 8. 2021.

### Održana 8. sjednica Gradskog vijeća Gračanica: sve u znaku Budžeta i budžetiranja

Budžet Grada za 2021. godinu planiran je u iznosu od 16.925.575, a za 6 mjeseci izvršen je sa 5.485.490 KM, što predstavlja značajan podbačaj na koji je uticalo više nepovoljnih faktora. Usvojenim Rebalansom Budžet je planiran u iznosu od 18.866.368, što predstavlja značajno povećanje od 1.940.793. U skladu s tim izvršene su njegove korekcije i na rashodovnoj strani. Za "krpljenje budžetskih rupa", planirano je i novo kreditno zaduženje u iznosu od 2.000 000 KM na 6 godina. Da li se očekuju nove budžetske dubioze, ostaje da se sačeka i vidi. U svakom slučaju, do kraja godine moguća su nova "rebalansiranja". Uz rebalans, usvojeni su i drugi prateći dokumenti koji se odnose na njegovo izvršenje, utrošak budžetske rezerve itd. Osim budžetskih pitanja koja su bila u centru pažnje ove sjednice, Vijeće je usvojilo i Izvještaj o svom vlastitom radu i radu svojih komisija i radnih tijela u prvih 6 mjeseci ove godine, kao i Izvještaj o realizaciji projekata u 2020. godini iz programa kapitalnih investicija općine Gračanica (2016. – 2020.). Iz ovog drugog izvještaja izdvojili smo podatak da je od projekata koji su planirani za 2020. godinu, u vrijed-

nosti od 7.380.836,00 KM, realizovano 70,19 % ukupne vrijednosti odnosno 5.230.354,00 KM, što se može smatrati zadovoljavajućim rezultatom. Bez veće rasprave prošle su još dvije značajne informacije: o aktuelnim privrednim kretanjima na području grada Gračanica u 2020. i o stanju bezbjednosti na području grada Gračanica. Razmatrana je i informacija o provedenom javnom pozivu za izbor upravitelja stambenih jedinica u Gračanici.

### 1.9. 2021.

#### Obilježen Dan 111./221. gračaničke brigade–otvorena “Spomen soba 1992.–1995.”

Delegacije Gradskog vijeća i boračkih organizacija položile su cvijeće na Centralno spomen obilježje gdje su se okupljenima obratili gradonačelnik Nusret Helić i ratni komandant 1. bataljona Amir Zejnilagić. Nakon kraćeg kulturno-umjetničkog programa, tim povodom uslijedilo je svečano otvorenje “Spomen sobe 1992.–1995.” Brojni svjedoci iz tog perioda donirali su različite predmete koji svjedoče o ratnoj gračaničkoj historiji, a koje je vrijedno prikupljao i selektirao historičar Edin Šaković (opširnije u rubrici “Povodom” u ovom broju našeg časopisa).

### 1. 9. 2021.

#### Planinari obilježili najviši vrh planine Trebave



U povodu 1. septembra – Dana 111. gračaničke brigade, Planinarsko društvo “Zefir”

Gračanica izvršilo je obilježavanje najvišeg vrha planine Trebave – 692 metara visokog vrha Vis, historijsko mjesto i poprište slavne bitke i pobjede Armije RBiH iz 1994. godine. Postavljanju ploče s nazivom vrha i označenom nadmorskom visinom prisustvovalo je dvadesetak planinara. Time je nastavljena aktivnost označavanja bosanskohercegovačkih vrhova i planina, koju članovi ovoga društva, u saradnji s Planinarskim savezom Federacije, praktikuju već nekoliko godina. Na području Gračanice prethodno je označen i vrh Sijedi Krš. U narednom periodu planiraju obaviti označavanje više planinarsko-pješačkih staza na širem prostoru Trebave, uz postavljanje odgovarajućih putokaza i obavještenja. Do sada su, uz podršku Grada Gračanica, označili prvu pješačko-planinarsku stazu na području Gračanice (staza Gračanica – Talambas – Jezera – Tunjevac – Vučjak), te uredili planinarsku kuću na Vučjaku, a u toku je i uređenje planinarske kuće na Visu.

### 2. 9. 2021.

#### “Zeka-Comerc” otvorio svoj osmi baucentar–u Cazinu

Mjesec dana nakon otvorenja baucentra u Bihaću, gračanička kompanija “Zeka-Comerc” svoju novu poslovnu jedinicu otvorila je i u Cazinu na adresi Čoralčić bb gdje se donedavno nalazio jedan od dva Cazinska trgovačka centra “Lucky Trade”. Riječ je o drugom “Zeka” baucentru na području Unsko-Sanskog kantona koji je ujedno i 8. u Bosni i Hercegovini. U njemu je otvoreno čak četrdeset novih radnih mjesta. Iz “Zeka-Comerca” su poručili da ovaj milionski projekat za njih predstavlja poseban izazov: “*Pretihodnih sedam baucentara razlikovali su se, naravno, svaki se po nečemu isticao i uz svaki su dolazile određene prepreke. Međutim, svi oni su imali i dosta sličnost, što za ovaj projekat ne možemo reći. Mi nikada do sada nismo kupili već postojeći trgovački centar zajedno sa robom koju je u tom momentu posjedovao na*

čak dvije lokacije, što se ove godine desilo sa kompanijom *Lucky Trade*” izjavila je za medije direktorica marketinga Nejla Aljić.

Pored osam baucentara, “Zeka-Comerc” posjeduje transport u Bosni i Hercegovini sa stotinu vozniha jedinica, transport u Sloveniji sa 20 kamiona, sopstveni proizvodni metalni pogon, te se bavi prodajom nafte i naftnih derivata. (izvor: <https://instore.ba/zeka-comerc-kupio-trgovacki-centar-lucky-trade-u-cazinu>)

#### 4. 9. 2021.

##### **Promocija knjige “Carstvo dječijih snova” autorice Lejle Kadić**

...održana je na terasi Osman-kapetanove medrese u Gračanici. Gost na promociji bio je Šimo Ešić, a promotorica i recenzentica knjige je mr. sc. Fatima Bećarević Softić. Ovo je treća knjiga autorice Kadić i svojevrzni nastavak na knjige “Što ja nemam čarobna krila” i “Priče dobre vile”. Knjiga “Carstvo dječijih snova”, kako je navela recenzentica knjige Fatima Bećarević Softić, “namijenjena je najmlađoj čitalačkoj publici, dječacima i djevojčicama koji tek ulaze u svijet pisane riječi i upoznaju ga kroz rime i ilustracije. Pjesme objavljene u ovoj zbirci otkrivaju dječiji svijet u svoj njegovoj raznolikosti i zanimljivosti. Osim avantura, ljubavi i igara, ove pjesme govore i o dječjim strahovima i nedoumicama koje upakovane u šarmantne rime zvuče lijepo i zanimljivo. U ovoj knjizi nastavljen je saradnja sa likovnom umjetnicom Majdom Dobrnjić, koja je u svom prepoznatljivom stilu ilustrovala cijelu knjigu.” O načinu na koji piše i inspiraciji govorila je autorica knjige Lejla Kadić, a prisutnima se obratio i Šimo Ešić predstavnik izdavačke kuće “Lijepa riječ” iz Tuzle, koji je predstavio niz knjiga, objavljenih u okviru edicije “Mali princ” u okviru koje su svoje mjesto našle i dječije knjige spisateljice Kadić. Učenici “School&School” multidisciplinarnih škole u Gračanici, recitovali su i čitali pjesme objavljene u ovoj zbirci, što je za prisutnu publiku

bio jedan od najzanimljivijih dijelova ove ve-sele i zanimljive promocije.

#### 16. 9. 2021.

##### **Radovi na asfaltiranju i sanaciji puteva u mjesnim zajednicama Gračanica, Škahovica i Miričina...**

Nakon pripremnih radova, izvršeno je asfaltiranje dionice puta u naselju Nurići prema groblju u Mjesnoj zajednici Škahovica i naselju Bijela Polja do skretanja prema Halilovićima na području Mjesne zajednice Gračanica, ukupne vrijednosti cca 60.000 KM. U toku su i radovi na sanaciji puteva prema Gornjoj Miričini, u naselju Brda i naselju Durakovići. Ukupna vrijednost radova je cca 100.000 KM. Uskoro kreću radovi i na ostalim putevima u mjesnim zajednicama i gradu prema utvrđenoj dinamici.

#### 20. 9. 2021.

##### **Otkriveno spomen-obilježje poginulim drafničkim borcima-šehidima na lokaciji izletišta Brezik (Drafnići)**



Na spomeniku su ispisana imena osam poginulih boraca sa područja gračaničke mahale Drafnići: Adem Mustajbašić, Hikmet Ibrisević, Izudin Tuholjak, Jasmin Džanić, Fadil, Sead, Omer i Senad Osmanhodžić. Spomenik su otkrili Fahrudin Mustajbašić i Sadmir Džanić, sinovi Adema Mustajbašića i Jasmina Džanića. Povodom otkrivanja spomenika, na Breziku je održan i malonogometni turnir a prisutne su pozdravili i gradonačelnik Nusret Helić, te predsjednik udruženja “Brezik”, Almir Mulavdić.

**28. 9. 2021.****“Dani evropskog nasljeđa” u Gračanici**

Nosilac ovog jedinstvenog projekta u Bosni i Hercegovini bio je Bosanski kulturni centar TK, uz partnere BKC Kalesija, BKC Živinice, BKC Gračanica i Centar za kulturu i informisanje Srebrenik. Domaćin manifestacije u Gračanici bio je Bosanski kulturni centar Gračanica, koji je za goste, učesnike manifestacije iz više gradova TK, predstavnike Ministarstva kulture, sporta i mladih TK, Zavoda za zaštitu kulturno-historijskog naslijeđa i druge priredio bogat program posjete. Posjeta Gračanici počela je obilaskom gračaničke čaršije i Sahat kule, Osman-kapetanove medrese, Bijele džamije, potom su gosti razgledali Zavičajnu zbirku, posjetili Centralno spomen-obilježje i staru kuću Mare Popović koja je data na korištenje udruženju žena “Gračaničko keranje”. Posjeta je završena obilaskom Starog grada Sokola, gdje su domaćini bile žene iz udruženja žena “Soko”.

**30. 9. 2021.****Održana 9 sjednica Gradskog vijeća Gračanica: izvještaj o finansijskoj reviziji gradske uprave**

Razmatrano je 12 tačaka dnevnog reda, od kojih se nekoliko odnosilo na odluke o zamjeni vijećnika u mjesnim zajednicama, usvojene su i dvije odluke iz oblasti prostornog uređenja, zatim nekoliko izvještaja, poput izvještaja o zaštiti životne sredine na prostoru grada, izvještaj o realizaciji strategije razvoja Grada Gračanica u 2020. i dr. Posebnu pažnju privukao je izvještaj o izvršenoj finansijskoj reviziji grada Gračanica za prethodnu godinu, sa planom operativnih mjera koje je potrebno poduzeti za otklanjanje nepravilnosti po preporukama Ureda za reviziju Federacije BiH. Razmatrana je i Informacija o realizaciji projekta poboljšanja sistema vodosnabdijevanja i proširenja sistema kanalizacione mreže na području grada Gračanica. Na dnevnu redu bilo je još nekoliko informacija, između ostalih, i informacija o

stanju bezbjednosti na području Grada koja je usvojena bez neke veće rasprave.

**1. 10. 2021.****Miralem Džaferović: 40 godina kontinuiranog djelovanja i rada na kulturnoj sceni Gračanice**

Samo tri četiri godine nakon otvaranja novog Doma kulture u Gračanici, negdje 1980. ili 1981. godine, počeo je nastupati u amaterskim predstavama tadašnjeg Kulturno-umjetničkog društva “Adem Alić”. Svojim osjećajem za scenu i glumu, već na startu, pokazao je da je naslijedio talenat od svog rano preminulog oca Hasiba, koji je ostavio vidnog traga u kulturnom životu Gračanice kao glumac amater. Od tih osamdesetih godina Miralem je ostvarivao zapažene uloge u mnogim predstavama, okupljao je oko sebe talentovane mlade glumce, a kasnije se i sam bavio režijom. Sa amaterskim glumačkim ansablama iz Gračanice igrao je na scenama mnogih gradova u Bosni i Hercegovini. Ovaj svoj stvaralački jubilej obilježio je skromno, poetsko-dramskim kolažom pod naslovom “Poetika u sjećanju”, koji je, uz pratnju vrsnog gračaničkog gitariste Tarika Kamarića, izveo za svoju vjernu publiku u multimedijalnoj Sali Tržnog centra “Etna” u Gračanici, “u inat nevremenu koje nas je zadesilo” –kako je za Radio Gračanicu izjavila organizatorica obilježavanja njegovog stvaralačkog jubileja, gračanička redateljka Mirela Trepanić Grbešić, (mислеći na pandemiju, ali i na ostale probleme u kulturi). Sljedeće večeri, u istoj Sali odigrana je gostujuća predstava “Kabadahija” Fondacije “Boris Divković” u kojoj mlada glumačka ekipa “razigrava” razne društvene devijacije i fenomene naše stvarnosti.

**2. 10. 2021.****Vrijedno priznanje “Dopisnik godine” gračaničkom novinaru Hasanu Čaliću**

Priznanje dolazi od Redakcije “Dnevnog avaza” povodom godišnjice lista, u kojem

ovaj nekadašnji novinar Radio Gračanice sarađuje još od 1994. godine. Objavio je na stotine izvještaja, reportaža, životne priče, pratio i prati sve važne događaje iz cijelog Tuzlanskog kantona i s područja sjeverne Bosne.. U svom radu, najviše pažnje posvećuje životu običnih malih ljudi, opisuje njihove sudbine, doživljava uspjehe i probleme. (Izvor: Avaz)

## 12. 10. 2021.

### Stanje epidemije na području Gračanice

Podaci za Gračanicu u posljednja 24 sata: sa ovim datumom potvrđeno je 12 novozaraženih, aktivno pozitivnih evidentirano je 78, dok se u izolaciji nalazi 213 lica; podaci za Tuzlanski kanton: evidentirano je 98 novih slučajeva zaraze od ukupno 457 testiranih uzoraka. Trenutno je zaraženo 1120 lica, 110 je u bolnici, a 9 na mehaničkoj ventilaciji.

## 22. 10. 2021.

### Pogoršanje epidemiološke situacije, povećan broj oboljele djece i ove godine otkazan gračanički vašer

Prema podacima koji su izneseni na sjednici Gradskog štaba civilne zaštite grada Gračanica, epidemiološka situacija se i na ovom području znatno pogoršala u odnosu na stanje u prethodnom mjesecu. Tako je 22. 10. evidentirano 108 pozitivnih, dok je izolacija bila određena za 198 građana. Zabrinjava činjenica da je među zaraženim povećan broj djece. Inače *u Gračanici je do sada prvom dozom vakcinisano 10.807, a revakcinisano 9.060 lica.* U skladu sa preporukama struke, produženim i novim mjerama Ministarstva zdravstva Federacije BiH kao i trenutnim stanjem epidemiološke situacije (Covid-19), Gradski štab civilne zaštite pozvao je građane na vakcinaciju i poštovanje svih propisanih mjera zaštite. Za potrebe transporta Covid pozitivnih pacijenata i obavljanje kućnih posjeta bolesnicima dodijeljeno je na korištenje JZU Dom zdravlja Gračanica vozilo kombi

Renault master Službe civilne zaštite grada Gračanica. Zbog mjera koje su na snazi i pogoršane epidemiološke situacije ni ove godine se neće organizovati tradicionalni gračanički vašer.

## 24. 10. 2021.

### Nakon renoviranja, ponovo u funkciji pozorišna dvorana BKC

Nakon svojevrzne prinudne pauze u djelovanju, uzrokovane aktuelnim stanjem sa korona virusom, život se polahko vraća i u Bosanski kulturni centar Gračanica. Ovu "prinudnu pauzu" iskoristili su za temeljito renoviranje pozorišne dvorane, kompletnu zamjenu stolica, poboljšanje kvaliteta grijanja, rasvjete na pozornici itd. Ponovno stavljanje u funkciju pozorišne dvorane obilježeno je gostovanjem Pozorišta mladih Sarajevo sa dječjom predstavom "Tobija" u kojoj igraju glumci Belma Lizde Kurt i Mario Drmač (24. 10.), a sutradan (25. 10), prikazivanjem filma "Toma" o nekada popularnom pjevaču Tomi Zdravkoviću, čiju režiju potpisuje glumac Dragan Bjelogrić.

## 28. 10. 2020.

### Uspješna gračanička kompanija "Index" d.o.o. preuzela sarajevsku firmu "Centrotrans Tranzit"

"Index" je počeo sa radom 1985. godine kao mala firma za mašinsku obradu metala. U poslijeratnom periodu imao je vrlo dinamičan razvoj. Vremenom se počeo polako uključivati u precizniju mašinsku industriju, posebno mašinsku obradu metala na najmodernijim CNC mašinama. "Index" se postavio na tržištu kao firma koja danas ima mogućnost izvršavanja visoko sofisticiranih zadataka za koje su dokaz mnogobrojni uspješni projekti. "Ova kompanija se stalno širi, napreduje i ulaže, a njenu profesionalnost prepoznale su mnoge firme iz EU", izjavio je za medije njen osnivač i vlasnik Fahir Humić. Između ostalog, "Index" je u proljeće 1919. godine stekao oko 44 posto

dionica sarajevske kompanije "Centrotrans Tranzit" (za oko 2,3 miliona KM). Kupujući još oko 48% dionica te firme za 4 KM postao je njen skoro sto postotni vlasnik (98% dionica). Inače, kompanija "Centrotrans Tranzit" locirana je na autobazi "Centrotransa" Stup na sjeverozapadnom izlazu iz Sarajeva. Nekada je bila u sastavu kompanije "Centrotrans" Sarajevo i pružala usluge prevoza, pretovara roba, održavanja i remonta vozila. Važno je napomenuti da danas nema ništa s firmom "Centrotrans Eurolines". (Izvor: <https://www.biznisinfo.ba/vise milion-ska-akvizicija-index-gracanica-preuzeo-sarajevsku-firmu/>, pregled: 30. 10. 2021.)

## 29. 10. 2021.

### Organizovan 4. po redu Sajam "Zlatne ruke Gračanice"

Riječ je o manjoj smotri ženskog poduzetništva, koju je i ove godine organizovao Grad Gračanica u saradnji sa udruženjima, Bosanskim kulturnim centrom, Turističkom zajednicom, te osnovnim i srednjim školama. Zbog epidemiološke situacije obim i sadržaj manifestacije znatno je reduciran, ali je važno, da se tradicija ne prekida. To je mišljenje i organizatora i brojnih posjetilaca Sajma.

## 29. 10. 2021.

### Umro inženjer Osman Čajić, dugogodišnji direktor gračaničkog "Vodovoda", poznati istraživač podzemnih voda i izvorišta pitke vode...

Rođen je 1936. godine u Gračanici. Završio je građevinski fakultet, odsjek građenje u Beogradu, a magistrirao na građevinskom fakultetu u Zagrebu. Kao mlad inženjer duže vremena je radio u rudniku soli Tušanj, zatim na velikom projektu vodosnabdijevanja "Sjeverna Bosna", te više godina kao direktor "Vodovoda" u Gračanici u kojem se pokazao i kao dobar rukovodilac i kao stručnjak, koji je uspostavio modernu organizaciju tog javnog preduzeća. U međuvremenu radio je i kao

direktor projektnog preduzeća (OOUR-a) u okviru građevinske radne organizacije "Građevinar" i kao šef općinske službe urbanizma i katastra u Gračanici. Uspješno se bavio istraživanjem podzemnih voda i projektovanjem sistema vodosnabdijevanja za više naseljenih mjesta kako na području Gračanice tako i u drugim općinama. Istraživačkim i savjetodavnim radom, sa istim entuzijazmom nastavio se baviti i nakon odlaska u mirovinu. Učestvovao je kako u izradi, tako i u realizaciji više projekata vodosnabdijevanja i odvođenja otpadnih voda, autor je studije "Vodosnabdijevanje općine Gračanice", a bio je i saradnik "Gračaničkog glasnika". Ukopan je 30. 10. 2021. na mjesnom greblju Režići.

## 29. 10. 2021.

### Održana 10. sjednica Gradskog vijeća Gračanica: projekcija Budžeta za 2022. godinu, zanimljive inicijative vijećnika Edina Šehića

Budžet Grada za 2022. godinu planiran je u iznosu od 14.337.913 KM u čemu planirani prihodi iznose 12.887.913 KM. Ostali dio Budžeta planiran je iz drugih izvora. Ostvareni prihodi u prvom polugodištu 2021. godine iznose 6.657.029 KM dok su ostvareni prihodi u 2020. godini iznosili 12.788.198 KM, što znači da se za narednu godinu ne planira nikakvo povećanje prihoda. Međutim, ukupni rashodi i izdaci ostaju u nivou planiranog Budžeta i u ukupnoj masi veći su za 16,52% u odnosu na ukupno izvršene rashode i izdatke u 2020. godini. U strukturi rashoda najveću stavku čine tekući i kapitalni izdaci u iznosu od 11.935.813 KM. Javna rasprava i Nacrtu budžeta trajat će mjesec dana. Pored budžetske projekcije, na dnevnom redu ove sjednice bilo je i niz drugih tačaka koje se obično odnose na neka kadrovska rješenja kako po mjesnim zajednicama, tako i u pojedinim organima gradske uprave, koja se samo "pro forme" povlače i provlače kroz Vijeće (npr. zamjene članova u vijećima pojedinih mjesnih zajednica, popuna nekih ko-

misija, među kojima i izborne itd.) Životna pitanja građana pokreću vijećnici uglavnom kroz instituciju "vijećničkih pitanja". Iako i to prolazi, uglavnom nezapaženo, ovog puta vrijedi spomenuti dvije inicijative koje je pokrenuo Vijećnik LDS Edin Šehić. Prva je da se naruči idejno rješenje ili studija saobraćaja u Gračanici i drugi da se u ovoj godini (kada je ponovo otkazan gračanički vašer) ta manifestacija pokuša dislocirati iz centra grada na neku pogodniju lokaciju. Iako su inicijative namjestu, teško je očekivati neki pomak. Ipak treba upozoriti na sljedeće: ukoliko se i ovo završi na nekom formalnom birokratskom odgovoru, u tom slučaju građani Gračanice mogu uskoro očekivati saobraćajni kolaps u samom gradu i vašarište u samom njegovom historijskom jezgru – kao i do sada.

## 29. 10. 2021.

### Narodna biblioteka "Dr. Mustafa Kamarić" Gračanica: nikad bogatiji "Oktobar mjesec knjige"

Manifestacija je počela 5. oktobra obilježavanjem Svjetskog dana učitelja, posebnom radionicom na temu "Moj učitelj – moja knjiga", nastavljena je 6. oktobra razgovorima o problemima biblioteka u osnovnim školama, sljedećih dana predstavljeno je nekoliko domaćih zavičajnih autora, organizovano više susreta sa mladim čitaocima, učiteljima itd. Manifestacija je simbolično završena 29. oktobra obilježavanjem Nacionalnog dana svjesnosti o bibliotekama u BiH. Tim povodom u Biblioteci je organizovano više prezentacija, druženja i razgovora sa čitaocima i prijateljima biblioteke. U međuvremeno realizovano je još petnaestak različitih sadržaja i programa, koji su popunili skoro svaki dan "Mjeseca knjige". Posebno izdvajamo 15. oktobra, kada je popisan ugovor o punopravnom članstvu gračaničke biblioteke u Kooperativnom bibliografskom sistemu i servisima COBISS.BH. (opširnije u članku "Ima li kulture u Gračanici", u rubrici "Teme" ovog broja našeg časopisa).

## 10. 11. 2021.

### Crveni krst Gračanica: uručena priznanja višestrukim dobrovoljnim davaocima krvi

Uručene su dvije Zlatne i tri Srebrne značke Crvenog krsta. Dobitnici Zlatne značke su Mirsad Maglajlić, zvani Sindi iz Gračanice, koji je do sada darivao krv 114 puta (više-stuko je nagrađivan i u Italiji, gdje je proveo svoj radni vijek) i Nedreti Alić iz Miričine, koja je krv darivala 75 puta. Zbog bolesti nije prisustvovala svečanosti. Srebrne značke uručene su: Esedu Osmanoviću iz Miričine, koji je darovao krv 61 puta, Kemiji Pašalić, penzionerki „Fortune“, darivala 60 puta i Aliji Ahmetagiću iz Škahovice, darovao krv 53 puta. Priznanja su uručili Mustafa Hrvić iz nadležne komisije Crvenog krsta i Ibrahim Nurkić, predsjednik Glavnog odbora Crvenog krsta Gračanica, koji je usput podsjetio da je na području Gračanice u prethodnoj godini krv darovalo 1838 osoba, što je relativno visok procenat u odnosu na broj stanovnika. Ove godine akcije darivanja krvi uveliko ometa pandemija, rekao je Nurkić (Izvor: Radio Gračanica)

## 10. 11. 2021.

### Štab Civilne zaštite Gračanica: da se preispitaju naredbe Kriznog štaba Ministarstva zdravstva Tuzlanskog kantona.

Riječ je o novim epidemiološkim mjerama od 5. novembra, koje ograničavaju rad ugostiteljskih objekata, tržnih centara i drugih sličnih djelatnosti do 21 sat. Umjesto takvih ograničenja potrebno je uvoditi stimulacije vakcinisanih lica u odnosu na nevakcinisane, što se već primjenjuje u zemljama Evropske unije i šire., a sve u cilju zaštite ugostitelja i obrtnika na čije poslovanje ovakve naredbe imaju izuzetan negativni uticaj, poručeno je sa tog sastanka. Prema „kovid-statistici“ na području grada Gračanica vodi se 150 aktivnih kovid slučajeva dok je 317 lica u izolaciji. Povećava se i broj hospitalizovanih slučajeva,

ali je činjenica da je od 27 lica koji su na hospitalizaciji, njih 26 nevakcinisanih, što je više od upozorenja za sve one koji izbjegavaju ili bojkotuju vakcine.

## **12. 11. 2021.**

### **Ponovo raste broj zaraženih u Gračanici**

Kako je za Radio Gračanicu saopštio direktor Doma zdravlja u Gračanici Jasmin Hadžić, „u zadnjih sedam dana oborili smo rekord na kantonu. Povećava se broj zaraženih sa teškom kliničkom slikom. Kroz kovid pedijatrijski odjel u Gračanici svakodnevno prođe u prosjeku 20-toro djece.“ Za narednih nekoliko dana organizovat će se vakcinacija i po tržnim centrima. Inače po statistici Doma zdravlja, prvu dozu vakcine u Gračanici primilo je 11.736 pacijenata, drugu dozu 10.106. Od 5.novembra realizuje se vakcinacija i trećom dozom koja je namjenjena rizičnim grupama.

## **15.11.2021.**

### **Premинуo dr. Davud Zahirović, istaknuti privrednik iz Gračanice**

Rođen je 3. 3. 1959. godine u Gračanici, gdje je završio gimnaziju. Diplomirao je na

Stomatološkom fakultetu Univerziteta u Sarajevu, a kasnije specijalizirao socijalnu medicinu na Medicinskom fakultetu u Sarajevu, gdje je okončao i postdiplomski studij. Po završetku studija radio je u Domu zdravlja Gračanica, a 1990. godine otvara privatnu stomatološku ordinaciju, Godine 1998. u Tuzli je osnovao firmu „Bosnafarm“, koja se bavila trgovinom na veliko farmaceutskim proizvodima, a otvorio je i više apoteka. Devet godina kasnije osnovao je firmu „ZADA Pharmaceuticals“, danas jednu od vodećih kompanija za proizvodnju lijekova u Bosni i Hercegovini, koja broji više od 180 zaposlenih. Bio je član Medžlisa Islamske zajednice Gračanica i Sabora Islamske zajednice, kao i predsjednik FK „Sloboda“ Tuzla. Isticao se kao donator u realizaciji različitih humanitarnih i drugih projekata, a posebno kod izgradnje vjerskih objekata, škola i bolnica. Sudjelovao je aktivno i u političkom životu (na lokalnim izborima 2020. bio je kandidat SDA za gradonačelnika Gračanice). Preminuo je iznenada u Sarajevu, od posljedica srčanog udara, u 63. godini života. Ukopan je 16. 11. u mjesnom groblju Trnovci.